

INUIT ATAQATIGIIT

Inatsisartuni



UPA 2017/163
Nuuk, 12 maj 2017
Villy Olsvig

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa, nunarsuarmi sumi inissisimanertik tunngavigalugu nunat tamalaat akornanni naalakkersuinikkut ingerlatsinerup silarsuaani nutaami nunat pineqartut inissisimanerata oqallisigineqarnissaa siunertaralugu ataatsimeersuartitseqqullugit.

(Aallartitat siulittaasuat Lars-Emil Johansen)

Siunnersuut imaattumik Inuit Ataqatigiinniit oqaaseqarfigilersaarneqarpoq.

Nunarsuatsinni nunat akornanni suleqatigiinneq allanngoriaateqangaatsiarpoq tamannalumi nunat avannarliit killiit ataatsimeersuartitsisinnaanermik siunnersuuteqarneratigut saqqummiunneqarpoq.

Nunarsuatsinniit EU-mi ilaasortaani aqqissuussaaneq qiviaannassagaanni paasiniassallugulu pingaaruteqarluinnassaaq nunatta aammalumi nunat avannarliit killiit suleqatigiiffianut tamanna qanoq sunniuteqarsinnaassanersoq, ilimagineqarsinnaalluarunarpormi inuutissarsiornikkut Tuluit nutaata EU-miit aninera annertuumik nunanut avannarlernut killernut sunniuteqarsinnaajumaarnissaa.

Nunat avannarliit killiit annertoorejussuarmik aalisarnermik aammalumi nunalerinermik ilaatigullumi Island-i qiviassagaanni takornariaqarnermik annertuumik suleqatigissutaalluarsinnaasunik ornigarneqarluartarpoq, taamaattumillu nunat avannarliit killiit aqutugalugit ilaatigut silaannakkut angallannerup annertusarneqarsinnaaneranik aallutaqarsinnaanermik pilersitsisoqartariaqarsorinarpoq, imaatigut suleqatigiilernikuuneq assersuutissaannaagunarpoq.

Nunat avannarliit killiit ilaatigut Tuluit nunaata EU-mi aninerata kingunerisaanik sutigut tamatigut atorluarsinnaaneranik siunnerfeqartumik qanimut peqataasineqarsinnaanera sulissutigineqartariaqarsorinarpoq, nunarsuarmimi ilaatigut oqaatsit atugaanerpaat tassaagunarput Tuluit oqaasii naak EU-miit aninerata kingunerisaanik oqaatsinut tunngasut nalilersorneqaraluartut, taamaattoq nunatsinni piffissami kingullermi meeqqalluunniit atuarianni oqaatsit sorliit atorneqarsinnaaneranik sammisaqarnermi tamanna tikinneqarsinnaagaluartoq.

Eqqaamassavarpulli namminersornerunerup eqqunneqarneraniilli nunatsinni ataatsimeersuarnerpassuit isumasioqatigiinnerpassuit maannamut qassimmitaava ingerlanneqarsimaleqqappat, nalilersorneqarsinnaagunarpullu qanoq nunami najukkatsinni isorartuumi inuuffikkuminaassinnaasartumilu tamakku kinguneqartitsisarsimasinnaanersut.

Ataatsimeersuarnerit isumasioqatigiinnernut sumut kikkunnullu sammisuuneri aallaavigalugillusoq peqataajortaraagut ilaatigut assuffassimaarluta, isumalluarluta nunatta namminiilersinnaanermik anguniagaqartoq ajunnginnerpaamik siunnerfilerusukkaluarlutigu, ukiulli arlaqannigitsut qaangiukkaangata iikasik katereqqittoqartaraaq nutaanillusoq oqariartuuteqarniarsaralutik.

Maannalu isumasioqatigiinneq ataatsimeersuarneq naamasseqqammerpoq tulluipporlu nunaqarfiit pillugit isumasioqatigiinnissaq, aperisariaqalinnginnerluta isumasioqatigiinnerimmita qassisaat ingerlanneqalarpa aammalu sunimmita kinguneqartitsinikuuva?

Naggataatigut siunnersuut Inuit Ataqatigiinniit tamakkiisumik taperserparput.